



Al jere dut cjàpât de emozion Jan, joibe di sere: a nol finive plui di fâ domandis a Odilo su ce ch'al varès viodût di uciei e di bestiis a Gradiscje. Si capive ben che i tignive un grum parcè che nol saveve nancje ce ch'e je une fiere. Al ubidive al prin colp a dut chel ch'al diseve Odilo cence "ma" e cence discuti! Ancje in machine a si preocupave su cetante strade che e restave ancjemò di fâ.

Cuant ch'o sin rivâts o vevin ducj trê un pôc di frêt cun chês cuatri gotis di ploie ch'a vignivin jù.

Al saveve che il nono al varès cirût dai ucieluts piçui par metiju inte scjaipule dongje cjase, fate sù par un cubie di rusignûi gjaponês ma restade un grum di timp vueide par vie che a costuçin bei bêçs. Cumò però il nono al jere stuf di viodile vueide e plene di jerbe (che o gjavi jo, ma nol vûl disi nuie) e vie in zâr pai bancuts jenfri scjaipulis cun uciei di cetantis cualitâts. "Odilo âstu di cjoli chel biel pampagal a chi?" No, lu à za vût... Zire che ti zire o sin rivâts dongje di un ch'al veve insets e li al piçul i tremave parfin la vôs cuant che i diseve a Odilo di cjalâ intes scjatulis chês bestiis che a someavin propit dai stecs. Cheste dai insets e je la sô passion plui grande in chest moment e al zire come un sienziât intal so zardin e ancje chi di noaltris cun tra i dêts simpri alc cu la tele di ragn o paveis o zupets o ce dal diaul che al rive a tirâ fûr di ogni cjanton. Intune butilie vueide di plastiche une bieie manade di insets stecs, intune altre un inset fuee cu la code riçade par sù come un sgarpijon: al jere il so mont tant desiderât e cumò lu veve!

Il siôr ch'al vendeve al à dât un grum di informazions su ce fâ e cuant fâlu ma jo o pensavi che lui nol scoltàs, emozionât come ch'al jere di vêju ducj par lui. Par ubidience dopo al

vignive daûr di noaltris doi, domandant cun vosute di mêl cuant che o saressin tornâts a cjase. Ancje Odilo a 'nd à cjolt uns cuatri ucieluts piçui e cussì dopo vê viodût ancje falcuts, animâi di zoo, animâi di curtîl plen di frêt ma ben strentis lis butiliis tes mans, nol viodeve l'ore di rivâ a cjase.

Mangjâ in premure par viodi cemût che Odilo i parecjave il tierari par lis creaturis: un acuari, residuât di une passion di cetancj agns indaûr, al è diventât la cjase pai i insets stec cuntun biel grum di fueis di baraçs par la lôr fan. Però nol podeve puartà l'acuari a cjase a Sant Andrât e nancje pensâsi di lâ a cjase cence almancul une creature! Intun bocon di vâs di veri al è finût il preziôs inset fuee ch'al manezave come chei par television! Come une metraie a cjase al contave a mulin dut chel ch'al veve viodût e mi soi inacuarte che al veve memoreât peraule par peraule chel ch'al veve dît il siôr ch'al veve vendût i insets! Branduardi al cjantarès "Alla fiera dell'est per due soldi mio padre comprò.." ma Jan al cjante: " "Inte fiere di Gradiscje (nono) Odilo a mi comprà insets che mi plasononin (par dîle come ch'a disin a Çarvignan).

***di Barbara Battel***